

Inatsisartut suleriaasiat § 33 naapertorlugu Inatsisinut Ataatsimiititaliami ilaasortat matumuuna aalajangiiffigisassatut siunnersuut saqqummiuppaat:

**Inatsisartut Ombudsmandiata 2018-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersut.**

(Inatsisinut Ataatsimiititaliaq: Anders Olsen ataatsimiititaliap Siulittaasua, Siumut, Sofia Geisler, ataatsimiititaliap Siulittaasuata tullia, Inuit Ataqtigiit, Stine Egede, Inuit Ataqtigiit, Anna Wangenheim, Demokraatit, Aleqa Hammond, Nunatta Qitornai)

**Tunngavilersuut:**

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malitarisassat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussatut suliaqarnissaanik pisussaaffilerpaat. Taamaalilluni Ombudsmandi Inatsisartut Naalackersuisunik nakkutilliinerannut sakkuuvoq, kisiannili aamma nunap innuttaasa eqqartuussiveqarnikkut illersugaanissaannut qulakkeerinnittuulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuttumi Ombudsmandip suliarisarsimasani nalunaarusiaralugit.

Ombudsmandip 2018-mut ukiumoortumik nalunaarusiaani – maannamut pisarnertut – suliat arlallit malittarisassatut tunngavimmi namminerimi imaluunniit malittarisassat allaffissuutigineranni kukkunerit amigaaatillu nalunaarutigineqarsimasut ilanngunneqarsimapput.

Ukiuni kingullerni Ukiumoortumik Nalunaarutit aamma, ajornartorsiutit minnerunngitsumik oqartussaasunut Inatsisartunullu soqutiginaateqartut pillugit, allaaserisanik ataasiakkaanik imaqtarsimapput.

Taamaalilluni innutaasut piginnaatitaaffitsigut isumannaatsuutinnissaat pisortatullu oqartussat suliassaminnik suliarinnittarnissaat nukittorsartuarneqaqqullugu anguniagaqarnitsinni ukiumoortumik nalunaarusiaq sakkutut ikiuutitullu atorineqarsinnaavoq.

Ukiumoortumik nalunaarutip saqqummiunneqannginnerani Inatsisinut Ataatsimiititaliaq Ombudsmandimik ataatsimeeqateqarpoq. Ataatsimiinnermi tassani Inatsisartut Ombudsmandiata ukiumoortumik nalunaarusiaata imarisaasa ilai ataatsimiititaliamut immikkut soqutiginaatillit ataatsimiititaliamut paasissutissiissutigineqarput.

Ataatsimiinnermi Ombudsmandip Inatsisinut Ataatsimiititaliamut ilisimatitsissutigaa Ombudsmandi suli uteqqiattumik pisortanut akissuteqaqqusilluni nukingisaarisariaqartarpoq.

Inatsisinut Ataatsimiititaliap tamanna tunngavigalugu erseqqissaatigissavaa, Inatsisartut Ombudsmandimut suliakkiussaannik Ombudsmandip suliarinninneranik innuttaasut inatsisitigut illersugaanerannut ajoqutaasumik pisortat akornusiinnginnerat imaluunniit pisariaqanngitsumik

kinguarsaannginnerat ataatsimiititaliamut pingaaruteqarluinnarmat.

Inatsisinut Ataatsimiititaliap isumaqatigiittup taamatut oqaaseqarluni Inatsisartut Ombudsmandiata 2018-imut nalunaarutaa pillugu siunnersuut Inatsisartunit tusaatissatut tiguneqartussanngorlugu saqqummiuppaa.

Ilanngulluguttaaq Inatsisartut Ombudsmandiannut 2018-imi suliai pillugit Inatsisinut Ataatsimiititaliaq qujassuteqassaaq.